

**PM yakin Kerajaan Perpaduan mampu bertahan hingga tamat penggal  
Astro Awani  
07 March 2023**

PUTRAJAYA: Perdana Menteri, Datuk Seri Anwar Ibrahim yakin Kerajaan Perpaduan pimpinannya akan bertahan sehingga tamat penggal pentadbiran.

Kenyataan tegas Anwar itu sekali gus menempelak kenyataan Presiden Pas, Tan Sri Abdul Hadi Awang yang mendakwa kononnya Kerajaan Perpaduan akan tumbang.

"Tugas kerajaan ini, pentadbiran ini, apa sahaja yang diperkatakan oleh Presiden Pas, walau apa pun, saya yakin gabungan ini akan bertahan sehingga tamat penggalnya.

"Lebih-lebih lagi mereka hanya retorik politik, saya memberi mesej yang kuat kepada Malaysia, bahawa kita perlu melakarkan perbezaan.

""Kita harus lakukan ini dan pastikan perubahan berlaku yang mana adalah penting untuk menyelamatkan negara daripada masalah yang membelenggu negara, ini bukan lagi soal pilihan," katanya.

Beliau menegaskan perkara berkenaan ketika menyampaikan ucapan Sesi Interaksi Perdana Menteri bersama Ketua-ketua Perwakilan Diplomatik Malaysia secara maya sempena Sesi Pemukiman Wisma Putra, pada Selasa.

Turut hadir, Menteri Luar, Datuk Seri Zambry Abd Kadir dan Ketua Setiausaha Negara, Tan Sri Mohd Zuki Ali.

Selain itu, Anwar juga mahu pentadbiran pimpinannya mempertahankan isu tata kelola yang baik.

"Semasa sidang Parlimen pagi tadi, saya berbicara mengenai tebatan banjir dan projek lain.

"Saya sudah mengarahkan semua keputusan sebelum ini berhubung rundingan terus dihentikan serta-merta kecuali projek yang sangat memerlukan dan kritikal boleh diteruskan dengan cepat namun tender yang teratur.

"Mengapa skandal besar ini berlaku terlalu lama bukan saja oleh tokoh politik, jadi mana golongan profesional dan ahli akademik. Skandal ini tidak akan berlaku jika kita mempunyai hati nurani untuk menyuarakan dan hentikan semua ini," katanya.

Selain itu, Perdana Menteri berkata, beliau juga mengajak rakyat untuk bersama-sama melakukan sesuatu yang boleh menjadikan negara kembali hebat.

"Jadi pegawai dan diplomat kita juga harus menunjukkan contoh maksudnya menjadi pemimpin yang kompeten, menjalankan tadbir urus baik yang mana etika dan nilai sangat dipentingkan," katanya.

**© 2023 Astro AWANI Network Sdn. Bhd. 200001032668(535275-D) All Rights Reserved.**

Source: <https://www.astroawani.com/berita-politik/pm-yakin-kerajaan-perpaduan-mampu-bertahan-hingga-tamat-penggal-409723>